

O'zbekiston Respublikasiga o'simliklar karantini nazoratidagi mahsulotlarni olib kirish

1. O'zbekiston Respublikasiga o'simliklar karantini nazoratidagi mahsulotlarni olib kirish O'zbekiston Respublikasining «O'simliklar karantini to'g'risida»gi Qonuni, o'simliklar karantini qoidalari, boshqa qonun hujjatlari, fitosanitar talablari, ushbu Nizom hamda karantin ruxsatnomalarida belgilangan talablar asosida amalga oshiriladi.

2. O'zbekiston Respublikasiga o'simliklar karantini nazoratidagi mahsulotlarni olib kirishga O'zbekiston Respublikasi Vazirlar Mahkamasi huzuridagi O'simliklar karantini davlat inspeksiyasi (keyingi o'rinlarda Inspeksiya deb ataladi) tomonidan berilgan karantin ruxsatnomasi hamda eksport qiluvchi mamlakatning vakolatli davlat organlari tomonidan beriladigan fitosanitar sertifikat yoki guvohnomasi bo'lgan taqdirdagina ruxsat beriladi.

Vakolatli davlat organlari mavjud bo'lmagan eksport qiluvchi mamlakatdan o'simliklar karantini nazoratidagi mahsulotlarni O'zbekiston Respublikasiga olib kirishga Inspeksiya tomonidan har bir partiyaga alohida holda beriladigan karantin ruxsatnomasi bo'lgan taqdirda yo'l qo'yiladi.

3. O'zbekiston Respublikasiga olib kirilayotgan o'simliklar karantini nazoratidagi mahsulotlar davlat chegara maskanlarida o'simliklar karantini davlat inspektorlari tomonidan nazoratdan o'tkazilishi shart.

4. O'zbekiston Respublikasiga olib kirilishi taqiqlangan yoki fitosanitar nazoratidan o'tkazilmagan o'simliklar karantini nazoratidagi mahsulotlarni O'zbekiston Respublikasiga olib kirish hollari aniqlangan taqdirda, ushbu mahsulotlar o'simliklar karantini davlat inspektorlari tomonidan mutaxassislar ishtirokida zararsizlantirilib, bu haqida dalolatnoma tuziladi hamda manfaatdor tараflarga ma'lum qilinadi.

5. Pochta jo'natmalarida, shuningdek avtomobil, havo va temir yo'l transporti ekipaji a'zolari va yo'lovchilarining bagaji (qo'l yuki)da O'zbekiston Respublikasiga olib kirish yoki uning hududidan olib o'tish (tranzit) taqiqlangan o'simliklar karantini nazoratidagi mahsulotlar mavjudligi aniqlansa, o'simliklar karantini davlat inspektori tomonidan mazkur mahsulotlar olib qo'yilishi va bagaj (qo'l yuki) egalari ishtirokida zararsizlantirilishi yoki yo'q qilinishi lozim. Bunda o'simliklar karantini davlat inspektori tomonidan ikki nusxada dalolatnoma tuzilib, uning bir nusxasi mahsulot egasiga topshiriladi.

6. O'zbekiston Respublikasiga chetdan kiritilishi mumkin bo'lmagan o'simliklarni ekish materiallari, o'simliklar karantini nazoratidagi mahsulotlar va ularning hududlari ro'yxatiga kiritilgan o'simliklar karantini nazoratidagi mahsulotlardan istisno tariqasida, begona o'tlarning karantin turlari qayta ishlangan holda ozuqa, em-xashak va ilmiy maqsadlarda respublikaga olib kirilishiga ruxsat beriladi.

7. O'zbekiston Respublikasida akkreditatsiyadan o'tgan diplomatik vakolatxonalar, konsullik muassasalari, xalqaro hukumatlararo tashkilotlar va savdo vakolatxonalarining (keyingi o'rinlarda diplomatik vakolatxonalar deb ataladi) nomiga yuborilgan va O'zbekiston Respublikasiga kirib kelgan o'simliklar karantini nazoratidagi mahsulotlarning namunalari umumiy asoslarda nazoratdan o'tkazilishi lozim.

8. Diplomatik vakolatxonalar vakillariga davlat chegarasidan o'tish vaqtida O'zbekiston Respublikasining o'simliklar karantini to'g'risidagi qonun hujjatlari hamda o'simliklar karantini nazoratidagi mahsulotlarni nazoratdan o'tkazish tartibi tushuntiriladi.

9. Diplomatik vakolatxonalar nomiga yuborilgan o'simliklar karantini nazoratidagi mahsulotlardan o'simliklar karantini davlat inspektori tomonidan uning egasi (vakili) va yuk kelib tushgan joydagi bojxona organi xodimi ishtirokida laboratoriya tekshiruvi uchun namunalar olgan holda, ular o'simliklar karantini nazoratidan o'tkaziladi. Mazkur yuklarga eksport qiluvchi mamlakatning vakolatli davlat organlari tomonidan berilgan fitosanitar sertifikat yoki guvohnomasi ilova qilingan bo'lishi lozim.

10. O'simliklar karantini nazoratidagi mahsulotning namunalari o'simliklar karantinidagi zararli organizmlar bilan zararlanish belgilari mavjud bo'lsa, ular ekspertiza uchun

tegishli karantin laboratoriyalariga topshiriladi. Ushbu namunalarda karantindagi va boshqa xavfli zararkunandalar, o'simlik kasalliklari hamda begona o'tlar mavjudligi aniqlansa, ularni zararsizlantirish yoki yuk jo'natuvchiga qaytarib yuborish shart, yuk jo'natuvchiga qaytarib yuborishning imkoniyati mavjud bo'lmasa yo'q qilinishi lozim. Bu haqida o'simliklar karantini davlat inspektori tomonidan alohida dalolatnoma tuziladi va manfaatdor tараflarga uch ish kunida ma'lum qilinadi.

11. Diplomatik vakolatxonalar nomiga oziq-ovqat sifatida foydalanish maqsadida kelib tushgan o'simlik mahsulotlari uchun fitosanitar sertifikat yoki guvohnomasi mavjud bo'lsa, laboratoriya tekshiruvidan o'tkazilgandan keyin karantindagi zararli organizmlar mavjud bo'lmasa, zararsizlantirilmagan holda ulardan foydalanishga ruxsat etiladi.